

January 1931

## 明永曆三十年官印

Zhongqin HUANG

Follow this and additional works at: [https://commons.ln.edu.hk/ljcs\\_1929](https://commons.ln.edu.hk/ljcs_1929)

---

### Recommended Citation

黃仲琴(1931)。明永曆三十年官印。《嶺南學報》，2(4)，71-75。檢自：[http://commons.ln.edu.hk/ljcs\\_1929/vol2/iss4/2](http://commons.ln.edu.hk/ljcs_1929/vol2/iss4/2)

This Article is brought to you for free and open access by the Scholarly Publications of Lingnan University (Guangzhou) at Digital Commons @ Lingnan University. It has been accepted for inclusion in 嶺南學報 Lingnan Journal (1929-1952) by an authorized editor of Digital Commons @ Lingnan University.

## 明永曆三十年官印

黃 仲 琴

右明永曆三十年鑄官印二方，廣東潮州海陽(今潮安，)縣城內出土。民國二十一年八月，借觀於潮州金山之麓。

其一：篆文外，印背上端，鑄「禮部」二字，右方，鑄「右提督澄海鎮前鋒營關防」十一字，右旁側面，鑄「永曆三十年二月 日」八字，左旁側面，鑄「天字一千八百二十九號大使許壽造」十五字。

其二：篆文外，印背上端，鑄「禮部」二字，右方，鑄「右提督澄海鎮後營關防」十字，右旁側面，鑄「永曆三十年二月 日」八字，左旁側面，鑄「天字一千捌百二十二 大使許壽造」十四字。

考清光緒二十四年重修海陽縣志，卷四十六，雜錄門：「郡，府前，英聚巷，光緒十三年，改建扶輪堂，於堂之中座，挖起舊土，至丈餘，白骨纍纍，脛甚長，人馬皆莫辨，命工人拾之，凡十餘筐。又得銅印三，細認篆文：一刻「右提督澄海鎮後營關防」，一刻「右提督澄海鎮驍翊營關防」，一刻「右提督澄海鎮領旗關防」，其印右，有永曆三十二年二月日等字，印左，有天字若干號大使許壽造等字，印背之首，又有禮部二字，三印，俱藏邑人袁鎮家。(據采訪冊修。)」

本條後，附案語云：「謹按周志載：康熙十三年，甲寅，劉進忠叛，尙之孝進剿。時臺灣鄭經寇漳泉，閩粵路梗，進忠求援耿精忠不

得，用希震(楊希震)計，納款於經，經授進忠伯爵，改用永曆年號。致故明甲申變後，桂王由榔，於順治三年，由肇慶府行宮，改元永曆，自順治乙酉，計至甲寅，共三十一年。進忠歸潮三年。三印，或為踰年乙卯所鑄歟？](註)

扶輪堂，為前清海陽全邑，文庠生以上，辦事公所。袁鎮光緒元年，乙亥科舉人，董築堂事，遂得此印，鎮故後，印歸某氏，本刊之圖，即就原印所鈐，大小一如原狀，印銅質厚，三分，有柄，亦銅製印背及側面，所鑄之字，筆劃淺細，未得良工，難施描拓，據某君云：「鎮當時所得，只此二者，非有其三。」豈其一已佚歟？抑某氏之言信耶？至於印文及紀年，志載與實物，稍有不同，當以眼見者為準。蓋志書僅據採訪冊纂修，未證原物，誤所不免。

案語之意，謂印屬劉進忠，雖屬不差，而分析未能明白。

關於劉進忠之紀載，不勝枚舉，茲就各書，參以寔地攷查，撮舉大畧，以供參考。

劉進忠，遼東人，清潮州鎮總兵官。康熙十三年，納款於閩耿精忠，獻潮郡十一州縣地。旋納款於台灣鄭經，鄭經當康熙二年，得朱由榔之計，仍稱永曆年號，進忠既降經，故亦遵永曆正朔。康熙十五年，進忠擊敗清尙之孝兵，入閩謁經，經待未盡禮，進忠怒，逕歸潮。卒入清，被殺。進忠初鎮潮，能制旗兵之擾民，潮人德之，於其死也，私立廟以祀，用其名之一字，號其廟，為進賢古廟。雕小木像，明裝甲冑立馬，潤面有威，或為真相？作者於觀銅印後，曾以知者之導，親至廟中。

觀上條，及前文案語，知劉進忠雖膺伯爵，斷無設立六官，而銅印背有禮部之文，此非進忠所鑄，其証一也。進忠在潮，即令鑄印

，授其所屬，而壤地褊小，編列據數，斷無至一千八百餘之多，此其證二也。

(註)編者按：順治三年係歲在丙戌(1546)，而非乙酉。又自順治乙酉計至甲寅亦只三十年，而非三十一年。潮陽縣志原文有誤。

夏琳閩海紀要：「明永曆二十八年，即清康熙十三年，秋，七月，潮州鎮總兵，劉進忠以城降鄭經，經遣援剿後鎮金漢臣，率舟師援之，以進忠爲右提督，封定虜伯。」可知印文所鑄之右提督，即爲進忠降鄭後，所領武職。

考績通典，明代武職，以五都督府左右都督爲尊。至所謂提督，有二種：一則以都御史充之，其品視其所帶之銜，尊貴同於總督經畧，此屬於文官兼任者也。其一如鎮守貴州總兵官，嘉靖三十二年，加提督麻陽等處地方職銜，及提督狼山副總兵等，此屬於武員者也。鄭氏既奉明曆，參用明官制，右提督之外，又有中提督，後提督，如閩海紀要所載，後提督吳淑，中提督劉國軒，中提督最貴，可以總督諸軍者也。

小腆紀傳，朱成功傳：成功既定台灣，制法律，定職官，興學校，修武備，以赤嵌城爲東都，曰承天府。

魏源聖武記，東南靖海篇，順治十四年。桂王封鄭成功延平郡王招討大將軍，成功分所部爲七十二鎮，設六官理事，便宜封拜。

閩海紀要，永曆二十八年，鄭經設六官，以洪磊爲吏官，楊英戶官，鄭斌禮官，柯平刑官，楊賢工官，陳繩武贊畫兵部。初，成功雖承制設六官，文書僅稱軍職，至鄭經中年，文武具啓，始稱臣。

此二印，既鑄於永曆三十年，在鄭經實行禮官之後，可知其係鑄給與劉進忠部屬，又考閩南雜志，金看傳，歲有元管軍上百戶銅印

，印背上刻云：管軍上百戶印，元統二年，四月日，中書禮部造。可見鑄印爲禮部職司，及鑄印文於印背，在明前已然，鄭經亦沿用舊制。又觀聖武記所載，可知澄海設鎮，亦承鄭成功遺法。

澄海爲劉進忠所轄，潮郡十一屬之一。茲畧述鄭氏對於潮屬之用兵，以見澄海一地，關係之重。

潮州府志，征撫篇，順治七年，澄海人黃海如陳斌，導鄭成功入潮，十七年三月，掠潮屬頻海諸縣，十一月復至。就中以在澄海鷓汀之役爲最巨，當時，鷓汀一帶鄉民，拒絕鄭兵，至今尙傳「有國姓，無鷓汀，有鷓汀，無國姓」之誓。杭世駿道古堂詩集中嶺南集云：順治丁酉(十四年)十一月，鄭成功攻澄海之鷓汀堡，鄰村入堡避賊者，七萬餘，堡破，同日受屠。有僧瘞之於闌子之原，題其碣曰：同歸域。門人章純儒，丁卯冬，曾經其地，感賦一律，予爲和之。

聞道鷓汀戰火紅，萬人同日殉滅洪，遊魂假息王風外，害氣禁消佛力中，日落饑齋翻白骨，雨深冤鬼哭青楓，書生也植如竿髮，殺賊思彎兩石弓。

杭世駿爲清人，故措詞如此，然殺戮之慘，已可概見。考潮州府志，關隘門，鷓汀城在澄海縣城西，(潮州府志征撫篇作西南，)二十里新港西，港口直通外洋，爲海防次要，是地清初，駐有叅將，見潮州府志征撫篇，李明條。其扼要可知。鷓汀如此，澄海之扼要更可知，宜鄭經於受劉進忠降後，鑄印設爲重鎮也。

閩海紀要，「順治十年，九月，時郝尙久守潮，被兵求援，鄭成功遣陳六御率兵救之，尙久狐疑不敢納，尋破鷓汀貝(卽鷓汀堡)，而還。初鷓汀貝恃其土城險固，聚衆剽掠，至是成功攻破之，屠其城，丁壯無遺」。此與杭世駿說，年月雖異，慘殺則同，閩海紀要作者

似欲爲成功諱，然德不勝威，固無從諱之也。

據閩海紀聞劉進忠於歸鄭後，仍再降清，爲康熙十六年，卽永曆三十一年，六月。在鑄此二印之後一年，豈既降清之後，其部曲携此印來潮，遂埋於城中歟？

台灣鄭氏史蹟，近人研究者甚多，其遺物，如裝火藥瓦罐，前在閩中，曾爲中央研究院歷史語言研究所，致得一具，此二印足證當年營制，尤屬重要史料，宜與光緒間雲南出土之永曆敕命之寶，同爲珍貴也。

明，鄭曉今言類篇：總兵印文，柳葉篆。附錄於此。

二十一年，十一月，二十六日。